

- 1' Wer meynt das jm gantz *nütz* gebrest
- 2' Vnd er glück hab vffs aller best
- 3' Den trifft der klüpfel doch zû letzt



### von vberhebung glucks

- 1 Der ist eyn narr der rümen getar
- 2 Das jm vil glück zû handen far
- 3 Vnd er glück hab jn aller sach
- 4 Der wardt des schlegels vff dem tach

---

1' nütz ] nüt GW5046 GW5047 3' letzt GW5046 ] lest GW5041 GW5047 2 glück GW5046  
] glücks GW5041 GW5047

5 Dann glücksal der zergenglicheyt  
6 Eyn zeychen ist vnd vnderscheyt  
7 Das gott des menschen sich verrücht  
8 Den er zû zyten nit heym sûcht  
9 Jm spruch / wort man gemeynlich gyecht  
10 Eyn fründ den andern offft besiecht  
11 Eyn vatter strofft offft synen sûn  
12 Das er vorcht hab / vnd recht ler tûn  
13 Eyn artzt / gibt sur vnd bitter trangk  
14 Do mit dest ee genâß der krank  
15 Eyn scherer meysselt / schnydt die wund  
16 Do mit der siech bald werd gesunt /  
17 We we dem krancken wann verzagt  
18 Der artzt / vnd er nit strofft / noch sagt  
19 Das solt der siech nit han geton /  
20 Er solt das / vnd das han gelon /  
21 Sunder er spricht / gend jm recht hyn  
22 Als das er will / vnd gelustet jn /  
23 Als wân der tüfel bschissen wil  
24 Dem gibt er glück / vnd richtum vil  
25 Gedult ist besser jn armût  
26 Dann aller welt glück / richtum / gût /  
27 Syns glücks sich nyemans überhab  
28 Dann wenn gott will / so nymbt es ab /  
29 Eyn narr ist wer do schryget dick  
30 O glück wie loßtu mich / o glück  
31 Was zychstu mich / gib mir so vil  
32 Das ich eyn narr blib noch eyn wil  
33 Dann grösser narren wurden nye  
34 Dann die all zyt glück hatten hye